

Millet, halk, etnika grupası, azınnık, topluluk – dilleri taa angı lafa dönmeyecek?

Hederlez ayın (may) 6-da Gagauziya hem gagauz halkı kutladı bizä dedelerimizdän kalma gagauzların en büyük hem maanalı milli yortularından birisini – Hederlez yortusunu, angısı “Canavar yortuları” hem “Kasım” gününän bir uurda bulunêr.

Gagauziyanın Hederlez yortusunun kutlamasının ana sırası yapıldı Çadır-daki “At-prolin” tamazlık at fermasının aulunda hem ipodromunda, nereyi Gagauziyadan 12 küü kendi aullarını kurdu hem gagauz milletini temsil etti. Ama, neçin sä, Gagauziyaya diil, ama Moldovanın bu günkü kuvetlerinä izmet edän hem ayırımcılı yapan primarlar hem Moldova parlamentın kendilerine “Büük gagauz” deyän deputatları bu kutlamaya gelmedilär. Taa da betör, Moldova kuvetlerinä “Ayrır – buyur!” politikasını kolaylaştırmaa deyni, onnar, annamadaan mı, pek islää annayarak mı, kendi yaptıklarınan bizi, gagauzları, millettän toplulaadan düşürmää deyni, Moldovanın öndercilerine kolaylı verdilär.

Örnek olarak, Çadır kasabasının parkında, Moldova Pravitelstvosunun Etnika arası ilişkileri Agenstvosunun ortaklıkta, Çadırın primariyası tarafından yapılan gagauz milletin Hederlez yortusu, var nicä demää bulgar halkın yortusuna döndürülmüşü, çünkü katıllannarın taa çoyu bulgar küülerindändi.

Burayı Moldova premyer-minist-rusu Dorin REÇEAN da buyur edilmişü, angısı, Gagauziyanın Hederlez yortusunun ana sırası yapılan erä iki kilometra etişmeyip, gagauzlara “comunității găgăuze” (gagauz topluluğu – *nışan AS*) hem “fiecărei etnii” (herbir etnika grupası – *nışan AS*) deyip, çadırlıları gagauzların Hederlez yortusunun kutladı.

Hep bölä bir kutlama “comunității găgăuze” (gagauz topluluğu – *nışan AS*) insannarına Moldova Prezidenti Maya SANDU da yollamış.

Bileriz, ani bizä gagauz milleti demäk için Moldova öndercilerinin dilleri dönmedii için, onnar bizi türlü şeylär yaptılar: milletlik – halk yaptılar, halklık – “etnika grupası” yaptılar, etnika grupasıydık – “azınnık” yaptılar, azınnıktık – üülen tarafta yaşayan yaptılar, üülen tarafta yaşayandık – topluluk yaptılar. Topluluk ardına taa ne çıkaracaklar?

Akademik hem poet Todur ZANET,
Gagauz Milli Gimnanın avtoru

Hederlez yortumuz kutluca olsun! Hepsimizä saalık hem uzun ömür!



Hederlez ayın (may) 6-da, dedelerdän kalma en büyük hem maanalı milli yortumuzdan birisi – Hederlez, Gagauziyanın herbir küüyündä hem kasabasında bakıldı. Ama en büyük kutlamalar Çadır kasabasının “At-prolin” tamazlık at fermasının ipodromunda geçti. Eski ikili kalendarä görä, Hederlez yortusu yılın yaz zamanını açêr. **5-ci sayfada**

Hakan FİDAN, ofițial olmayarak, Mihay PAPUŞOYlan buluştu

Hederlez aynı 7-dä, Polşanın başkasabasında Varşavada geçti Evropa Birliin dışışleri ministrularının ofițial olmayan Toplantısının (Gymnich) çerçevesindä, Türkiye dışışleri ministrusu Hakan FİDAN buluştu Moldovanın premyer-ministru yardımcısı hem da dışışleri hem Evropaya integratıya ministerliin ministrusu Mihay PAPUŞOYlan.



Türkiye dışışleri ministrusu Hakan FİDANı hem Moldovanın premyer-ministru yardımcısı hem da dışışleri hem Evropaya integratıya ministerliin ministrusu Mihay PAPUŞOYun ofițial olmayan buluşmasında, Türkiye-Moldova ortaklı soruşlarında konsolidaıyası hem ikili işbirliin kaavileşmesi görüştü.

Hani romınca, angliyca hem Türkiye türkçesinde üüretmök olacektı?



Hederlez ayın 6-da Moldova Respublikasının üüredicilik hem aa-raştırma ministrusu Dan PERÇUN (Dan Perciun) hem Türkiye Respublikasının üüredicilik ministrusu Yusuf TEKİN, onlay konferenıya sırasında, Moldova Pravitelstvosu hem Türkiye Pravitelstvosu arasında “Zanaat hem teknik uurunda üüredicilikte işbirlii Protokolu” imzaladılar, angısına görä, son-sonunda, Komratta kolecin açılmasına izin verilecekmiş. **3-cü sayfa**

Evgeniya GUȚUL: “Bu jurudika dooruluu diil – bu represiyalar!”

Hederlez ayın 12-dä Kişinevün Çokana sudu, sora da Hederlez ayın 21-dä Kişinevün Apelâtiya Palatası genä karar aldılar bir kabaatsız tutuklanan Gagauziya Başkankasını Evgeniya GUȚULu taa 30 gün ev arestında brakmaa.



Nicä bildirer Gagauziya Başkanın pres-službası, kendi advokatların aracılınan Hederlez ayın 12-dä Gagauziya Başkankasını Evgeniya GUȚUL açıkladı, ani “bütün bir kabaatsız hem bir temelsiz sud benim ev arestımı taa 30 günä uzattı. Bu dooru daavacılık diil. Bu bir politika tepelemesi hem Gagauziyanın aazını kapamak denemesi”.

Hederlez ayın 21-dä, Evgeniya GUȚULun advokatların danışmasına görä, onun serbest brakılması için konu Kişinevün Apelâtiya Palatasında da inceledi, ama Camabisinin ev arestını ortadan kaldırmadı.



Kendi advokatlarının aracılınan Evgeniya GUȚUL açıkladı, ani Kişinev “Apelâtiya Palatasının sudyaları, bir argumentsız, genä ev arestımı ortadan kaldırmaa istämedilär. Bu jurudika dooruluu diil – bu represiyalar! Bunun uuru

bir – kırmaa benim hem gagauz halkın ruhunu hem Gagauziyayı Kişinev emiri altına almaa! Ama bu olamayacak”.

Sud gidärkenä, Gagauziya Başkankasının taraftarları sud binalarının önündä protest mitingları yaptılar.

Rusiya hem Ukrayna arasında barış annaşması için buluştular

Hederlez ayın 16-da, Türkiye dışişleri ministrusu Hakan FİDANın başkannında, İstanbulda Türkiye - Rusiya - Ukrayna delegaŋıyaları arasında bir toplantı yapıldı. Toplantının temel konusuydu: Rusiya hem Ukrayna arasında barış annaşması kararın yollarının bulunması hem barış annaşması.

Açıklamalara görä, bu buluşmada sade bir konkret karara varıldı: Rusiya hem Ukrayna arasında esir kalan her taraftan birär bin askerlän diişmäk.

Kalan konularda bir sonuç alınmadı, çünkü Rusiya Federatiyası tarafının sert teklifleri Ukrayna kabul etmemesini belli etti. Bu sert tekliflerin arasında:

– Ukrayna hem dünnää cümnesi tarafından Kırımı hem Ukraynanın bu günkü Doneŋk, Lugansk, Zaporojye

hem Herson bölgelerini Rusiya toprakları olarak tanımak;

– Ukrayna lääzım tarafsız statusunu kabletsin hem orada yabancı asker hem kaplama silählari olmasın;

– Ukrayna Rusiyadan reparatiya istemektän inkär olsun.

Ukrayna kendi tarafından bildirdi, ani barış için lafetmää deyni, Rusiya lääzım bütün frontta ateşi kessin da ondan sora annaşmak masasına otursun.



Moldova karabinerleri hem Türkiye jandarma arasında işbirlii

2025-ci yılın Hederlez ayın 13-14 günnerindä Moldova Respublikasının içişleri ministerliin Karabinerleri Baş inspektiyasına bir vizitlan Türkiyenin jandarma delegaŋıyası geldi.



Türkiye Jandarma Baş komandirin yardımcısı İsmail BALİBEK başkannında delegaŋıya Moldova Karabinerleri Baş inspektiyasının imzaladı bir Memorandumu, angısının temelindä karşılıklı hem uzun zamannı işbirlii bulunır.

Moldovaya vizit zamanında, Türkiye Jandarma Baş komandirin yardımcısı İsmail BALİBEK başkannında delegaŋıya Türkiye Kişinev Bükkelçiliinä dä bir vizit yaptı hem burada Bükkelçi Uygur Mustafa SERTELLän buluştu.

“61-ci Düzenleyici organnarın Evropa Platforması (EPRA)” toplantısı

Hederlez ayın 15-16 günnerindä Kişinevdä geçti “61-ci Düzenleyici organnarın Evropa Platforması (EPRA)” toplantısı, angısının burada yapılmasının iki sebebi vardı: EPRAnın kurulmasının 30-cu yıldönümü hem “Moldova Respublikasının audiovizual sredstvoları için Zakon”un kabledilmesinin 30-cu yıldönümü.

EPRA – bu audiovizual uurunda düzenleyici organnarın bir platforması. Bu platformanın toplantısında 50 devlettän yakın 130 delegattan zeedä insan pay aldı. O insannarın arasında vardılar Türkiye Radyo hem Televizeniya Üst Kuruluşu (RTÜK) geçici başı Orhan KARADAŞ hem RTÜK

delegaŋıyasının azaları, angıları Türkiye Kişinev Bükkelçiliinä dä bir vizit yapıp, orada Türkiye Kişinev Bükkelçisi Uygur Mustafa SERTELLän görüşülär.

“61-ci Düzenleyici organnarın Evropa Platforması (EPRA)” toplantısında pay aldı hem nasaat etti Moldova Prezidenti Maya SANDU.



Hani romınca, angliyca hem Türkiye türkçesindä üüretmək olacektı?

Hederlez ayın 6-da Moldova üüredicilik ministrusu Dan PERÇUN (Dan Perciun) hem Türkiye üüredicilik ministrusu Yusuf TEKİN, onlay konferențiya sırasında, Moldova hem Türkiye arasında “Zanaat hem teknik uurunda üüredicilikte işbirlii Protokolu” imzaladılar, angısına görä, son-sonunda, Komratta kolecin açılmasına izin verilecekmiş.

Gözäl hem çoktan beklenän bir anaşma, çünkü 2015-ci yılda, Gagauziyada gagauz dilini genişlettirmää hem uşaklarımıza üüredicilik uurunda üüsek izmetlär vermäk için, TİKA tarafından başlanan hem 2022-ci yılda başarılan “Türkiye Prezidenti Recep Tayyip ERDOĞAN üüredicilik kompleksi” ana binası, Moldovada kuvettä bulunan kişilerin hartakları beterinä, hep taa boş durër.

Bu kolec açılısı deyni, Moldova tarafı, bu üüredicilik kompleksini, industriya kolecına çevirip, adadıydı, ani burada 3 dildä – **romınca, angliyca hem Türkiye türkçesindä** üüretmək olacek. Şindi sä belli oldu, ani bu – vakıdı uzatmaa deyni, Moldovanın bünkü kuvetlerin bir yalanıymış. Şindiki Protokola görä, burada sade **ROMINCA** üüredicilik yapılacak. Bur bir iş.



İkincisi dä – Gagauziyaya hem gagauzlar için yapılan bu kompleks **Gagauziya varlı diil artık**, ama Moldovaya mal olarak verildi. Şindi buna karşı Gagauziyada analardan-bobalar-dan protest imzaları toplanër.

Üçüncüsü dä o, ani **artık Moldova-nın malı olan** kolecin ileri dooru düzülmesi (obşcejitiyalar hem başka ek yapılar), nicä dä ana binanın iç donatımı, laborotoriyalar hem oborudovaniyalar, hep bu protokola görä, Türkiye

devleti tarafından, TİKA yolunnan, yapılacak.

Protokola görä, kolecda informatika, elektrika hem elektronika tehnologiyaları uurunda zanaatlar bölümneri açılacak. Tekrar urgulêırız, ani “Türkiye Prezidenti Recep Tayyip ERDOĞAN üüredicilik kompleksi” taa çok **gagauz dilini genişlettirmää deyni kurulduydu**.

Akademik hem poet Todur ZANET, Gagauz Milli Gimnanın avtoru

Şah hem mat: dildä bizä köstek, bulgarlara sa yol

Moldova hem Bulgariya dışışleri ministruları Mihay PAPUŞOYlan Georg GEORGİYEV annaştılar, ani Taraklı kasabasında Moldovada bulgar universitetin filialı açılacak.

Bu olaylan ilgili ortak bir preskonferențiya Canabileri açıkladılar, ani Taraklı kasabasında açılan Moldovada bulgar universitetin filialında üüretmək **bulgarca, romınca hem angliyca** olacek.

Te bölä – şah hem mat, sana Gagauziyada industriya kolecına çevirilän “Türkiye Prezidenti Recep Tayyip ERDOĞAN üüredicilik kompleksi”na, neredä, 2024-cü yılın Kırım (dekabri) ayın 30-dakı Moldova pravitelstvosu kararına görä, **romınca, angliyca hem Türkiye türkçesindä** üüretmeyä adadıydılar, ama, bizä sormadaan, sade romıncayı braktılar.

Moldova tarafı, taa ilerki sözlerindän bir umursuz atılıp hem son-sonunda domaldıp, Komrat kolecına sade romıncayı soktu.

Gagauziyada binnärcä insan Enseyiş Günün 80 yıldönümünü kutladı

Hederlez ayın 9-da (9 May) Gagauziyada binnärcä insan Enseyiş Günün 80 yıldönümünü kutladı hem II-ci Dünnä Cengindä faşist hem naştist Germaniyanı enseyän kurtarıcı askerlerin pamätniklerinä hem anmak memoriallarına çiçeklän venoklar koydu hem da “Ölümsüz polk” öryüşünä katıldı.



Öryüşlerdä Gagauziya insannarın ellerindä II-ci Dünnä Cengi veteranların patretleri, Enseyiş Bayraan kopyaları hem Moldovaylan Gagauziya Bayrakları vardılar. Kimi insannar hem uşaklar ozamankı Kırmızı asker rubalarına giyimniydilər.

Gagauziya kasabaların hem küülerin belli erlerindä toplanan hem

memoriallara yollanan kolonnaların önnerindä duhovoy orkestralar gidärdi.

Memoriallarda kısa mitinglarda nasaat etmeklerdän hem bir minutiluk susmak saygılarından sora, insannar çiçek hem venok koydular kurtarıcı askerlerin son dinnenmək erlerinä.

Tamamnandı bu saygılı sıralar o Bük Enseyişä adanmış kontertlärlän.

Enseyiş Gününä 80-ci yılına adanan 80 kilometralık marafon

2025-ci yılın Hederlez ayın 7-dä, Gagauziyanın en genç primarların çalışmasınan, faşizmayı hem naşizmayı Enseyiş Günün 80-ci yıldönümünä adanan 80 kilometralık bir marafon yapıldı.

Marafonun başında Gagauziyanın en genç primarları Vasiliy KAP-SAMUN (Dizgincä küüyü), Evgeniy TUKAN (Kongazçık küüyü) hem Dimitriy KÖSÄ (Tomay küüyü) oldukları için, bu marafona start verildi Dizgincä küüyündä dä, Komrattan, Baş küüyündän, Kongazdan, Baurçudan hem Çadırdan geçip, Tomay küüyündä o sona erdi.

Enseyiş Günün 80-ci yıldönümünä

adanan 80 kilometralık marafonda irmi kişidän zeedä pay alannar, yollarında olan herbir kasabada hem küüdä durgunup, bir minutiluk susmaklan saygı gösterdilär o uzak cengin kahramannarın anmasına.

Marafonun sonunda, Tomay küüyün kurtarıcı askerleri pamätniin yanında, marafoncuları Gagauziyanın artistleri gagauz halk oyunlarının karşıladılar.



2025 yıl Türkiyedä “Aylä Yılı” olarak bildirildi



Günümüzde aylelerin karşı-karşıya kaldı soşial, ekonomika hem kultura problemlerinin artması beterinä, aylä institutun korunması pek önemindir. Bu iş için, Türkiye Respublikası Prezidenti Sayın Recep Tayyip ERDOĞANın kanadı altında, 2025-ci yılı Türkiyedä “Aylä Yılı” olarak bildirildi. 2025 yılın Aylä Yılı bildirilmesi, cümnenin en temel yapısı olan aylä institutuna enidän dikkat çekmek tarafından pek önemnidir.

Annayarak, ani güçlü toplumnar güçlü aylelerdän oluşer, Türkiye Re-

publikasının Aylä hem Soşial izmetleri ministerlii, Aylä Yılı sebepinnän, aylelerin karşı-karşıya kaldı problemlere şafk tutmaya, çözmäk tekliflerini geliştirmeyä hem aylä merkezi olan politikalara ön vermäk kolaylını ortaya koymak çalışmaları örütmä uurunı tuter. Bu üzerä, prezidenın Administrasiyası kanadı altında hem Aylä hem Soşial izmetleri ministerlii koordinatıyasında “Aylenin Korunması hem Güçlendirilmesi bakış Belgesi hem Yapılacak Planı” hazırlayarak uygulamaya koyuldu. Ayrıca 2025 Aylä

Yılı çerçevesindä Türkiyedä türlü sıralar hem proektlar ömürä geçiriler.

Aylenin korunmasında önelik çalışmalar baalamında, aylä çalıştayları düzenlendi, ev çorbacılında kimi araştırmalar yapıldı, Aylä Institutunnın demografiya Politikaları Kuruluşu kuruldu, evlenecek gençlerä kredit yardımı hem para kolaylıklar saalandı, duuma yardımımızın büyüklüü genişledildi, “İlk üredicim – Ayläm” mobil uygulaması hazırlandı, ayrıca gezilerdä hem kino gibi kulturalı sıralarda aylelerä indirim yapılması saalandı.

TİKAdan “Moldovada Ana hem Uşak Saalına yardım etmäk üüredicilik Programa”sı

Hederlez ayın (may) 5-9 günnerindä, TİKA tarafından hazırlanan hem Kişinevdäki Ana hem Uşak Saalını araştırma Institutunnın ortaklıkta yapılan, bir “Moldovada Ana hem Uşak Saalına yardım etmäk üüredicilik Programa”sı geçti.

Bu Programanın baş teması oldu “Eni duan uşaklarda üstolan durumnarı elä almak – en küçük paşientların güvenniklerinin önemni alanı”.

Bu üüredicilik programasının teoriya hem praktika urokları geçtilär

Türkiye Respublikasından Moldovaya gelän ekspertların hem doktorların yardımınan.

Hederlez ayın (may) 7-dä “Moldovada Ana hem Uşak Saalına yardım etmäk üüredicilik Programa”sına



katılan doktorlara bu uurda diplomalar verildi. Diplomaların verilmä sırasında pay aldılar: Kişinevdäki Ana hem Uşak Saalını araştırma Institutun baş direktoru Sergiu GLADUN, Moldova Respublikasının saalık ministerliin Ana hem Uşak Saalını servisin başı Dorina SAVOSCHIN, Türkiye Kişinev Büükelçisi Uygur Mustafa SERTEL, TİKA Kişinev ofisin koor-

dinatoru Tarık METE hem TİKAda Moldova masasına bakan Fatih ÇELİK.

Kişinevdäki Ana hem Uşak Saalını araştırma Institutu şükür etti hepsinä, kim omuz koydu bu üüredicilik programası olsun deyni, çünkü bu iş yardımcı oldu Moldovada herbir ananın hem uşaan saalını korumak sistemasını taa da kaavileştirmä.

TİKAdan “KOHA biblioteka sisteması”na integratıya kursaları

TİKA hem Moldova kultura ministerliin işbirliindä Kişinevdä yapıldı “KOHA biblioteka sisteması”na integratıya uurunda maasuz üüredicilik kursaları.



Hederlez ayın 6-7 günnerindä Moldova Respublikasının Milli Bibliotekasında yapıldı Moldova bibliotekacılarına deyni iki günük “KOHA biblioteka sisteması”na integratıya uurunda maasuz üüredicilik kursalar, anğıları oldu TİKA hem Moldova kultura ministerliin ortaklık proektı.

Maasuz bu üüredicilik kursalarına deyni, TİKA yardımınan, Türkiyedän “KOHA biblioteka sisteması”nı bilän dört kişilik bir bibliotekacı grupası getirildi.

Kursaları geçtikleri için, Moldova bibliotekacılarına katılım Sertifikatları verildi. Sertifikatları vermä sırasında pay aldılar Türkiye Kişinev Büükelçi-



si Uygur Mustafa SERTEL, Moldova kultura ministerliin devlet sekretari Andrey KİSTOL, TİKA Kişinev ofisin

koordinatörü Tarık METE hem TİKAda Moldova masasına bakan Fatih ÇELİK.

Hederlez yortumuz kutluca olsun! Hepsimizä saalık hem uzun ömür!

Hederlez ayın (may) 6-da, Gagauziya kultura Upravleniyasının (GKU) çalışmasınan hem İspolkomun bütün kuruluşların yardımınan, Çadırdaki “At-prolin” tamazlık at fermasının ipodromunda Gagauziya kutladı Hederlez yortusunu, angısı “Canavar yortuları”ımızlan hem “Kasım” yortumuzunnan bilä, sayılêr dedelerimizdän kalma en büyük hem maanahı milli yortulardan birisi.

Bakmadaan ona, ani Hederlez ayın (may) 5-6 gecesindä yaadı bir büyük yamur, Çadırdaki “At-prolin” tamazlık at fermasının auluna toplandılar bütün Gagauziyadan insannar hem artistlêr. Kendi aullarını kurdular avtonomiyanın 12 küüyü, ani, kendi sergilerindän kaarä, “Kurban bulguru” konkursuna da katıldılar.

Bundan kaarä, yortuya katılannara deyni, türlü oyun hem sport bölgele-ri kuruldu, el ustaların panayırı açıldı hem kilimnär sergisi yapıldı.

Yaamur beterinä, artık adet olan, “Altın At” at koşuları yapılmadı, ama onnarın erinä Bender kasabasından gelän “Sparta” atlı sport klubun sportsemennarı “konkur” yarışi elementla-

rını gösterdilər. Ayırıcä atlı eşektä yarışmalar yapıldı.

Yortu başarıldı büyük bir konçertlän hem 500 kişilik fleşmoblan.

Hederlez yortusunun kutlamasında, Gagauziya öndercilerindän kaarä, pay aldılar diplomatlar, Türkiyedän hem başka erlerdän musaafirlêr, bilim, kultura hem sıradan insannar.



6-cı Türk Dünnäsi Ozannar Şöleni hem Ali Ekber Çiçek Anısına Aşık Literatürası Çalıştayı

Hederlez ayın 13-16 günnerindä Türkiyenin Erzincan Binali Yıldırım Üniversitendä geçti “6-cı Türk Dünnäsi Ozannar Şöleni hem Ali Ekber Çiçek Anısına Aşık Literatürası Çalıştayı”, angısı Erzincan Valilii, Erzincan Binali Yıldırım Üniversitesi, Erzincan belediyesi (primariyası), Türkiye kultura hem turizma Ministerlii, Türk İşbirlii hem Koordinatıya Agenstvosu (TİKA), Türkiyenin Yurtdışı Türklêr hem Akraba Topluluklar Başkanını (YTB), Türkiye Yunus Emre İnstitutu hem Dede Korkut Ozannar Dernäi işbirliindä düzennendi.



Erzincan Binali Yıldırım Üniversitetin rektoru Prof. Dr. Akın LEVENTİN hem bu Üniversitetin incäzanaat hem literatürä fakultetin Türk dili literatürası kafedrasının azası Prof. Dr. Ali

KAFKASYALının buyur edilmesinä görä, “6-cı Türk Dünnäsi Ozannar Şöleni hem Ali Ekber Çiçek Anısına Aşık Literatürası Çalıştayı”na Türkiyedän, Azerbaycandan, İrandan, Kazahstandan, Özbekistandan ozannar, aşıklar, akınnar, babşılêr hem bahşılêr geldilər. Bundan kaarä burayı buyur edilmişti taa Dou Turkistandan, Kitaydan Balkannara kadar, Gruziyadan, Poyraz Makedoniyadan hem Gagauziyadan bilim hem incäzanaat insannarı da.



Onnarın arasında vardı Akademik Todor ZANET ta.

Çalıştayın birinci günündä türk

dünnäsindän ozannar, aşıklar, akınnar, babşılêr hem bahşılêr, Erzincan kasabasının insannarına deyni, kasabanın, Türk dünnäsının bayraklarınan donaklı, baş meydanında uzun bir konçert gösterdilər. Konçerttä, erli ozannardan hem aşıklardan kaarä, Şölenä gelän azerbaycanı, irannı (azerbaycan, türkmen hem kaşkay halkların temsilcileri), kazahlı, özbekistannı ustalar talantlarını gösterdilər.

“6-cı Türk Dünnäsi Ozannar Şöleni hem Ali Ekber Çiçek Anısına Aşık Literatürası Çalıştayı” ana sırası Hederlez ayın 15-dä Erzincan Binali Yıldırım Üniversitetin “Prof. Dr. Erdoğan Büyüksap Kongres hem Kultura Merkezi”ndä geçti.

Sonu 6-cı sayfada

“Can ilacı” adlı kiyadınnan tanıtı

Hederlez ayın 15-dä poet Andrey PALİK Komrat ATATÜRK türk bibliotekasında “Can ilacı” adlı ilk peet kiyadına bir prezentațiya yaptı.



Kongazlı avtorun “Can ilacı” adlı ilk peet kiyadın prezentațiyasına Komrat ATATÜRK türk bibliotekasına geldilər avtorun dostları, gagauz yazıcıları hem kultura insannarı, bibliotekacılar hem okuyucular.

Kirilişada tiparlı kiyada toplu avtorun 57 peet. Nicä bildirdi kendisi Andrey PALİK, bu kiyat – onun yaratmalarının sadece üçüncü payımı. Onda, en azdan, taa bir toplum için peet varmış.

Prezentațiya sırasında avtoru kutladılar Gagauziya kultura Upravleniya-sının başı Marina SEMÖNOVA, ATATÜRK türk bibliotekasının direktoru Vasilisa TANASOGLU,

resimci hem türkücü Vitaliy MANCUL, muzikant Radion YASIBAŞ, kultura insannarı Vera SİBOVaylan Mariya ARNAUT hem taa başkaları.

“Can ilacı” kiyadın tirajı 300 taanä. Onun bir payı bibliotekalara verilecek.

Gagauziya 1 May yortusunu baktı

1 May yortusu, İş hem İlkyaz Günü hem dâ Zaametçilerin halklararası dayanışma Günü olarak, Gagauziya demonstrațiylarlan, mitinglarlan hem şenniklän baktı.



Taa Gagauz devletliini kurmak günnerindän beeri görünmeyän bir insan akıntısınnan on binnärlän insan, “Barış! İş! May!” lozungun altında, demonstrațiya kolonnalarinnan sokaklara döküldülär. Moldova hem Gagauziya bayraklarinnan hem dâ türlü transporantlarlan ellerindä, insannar İşlän, Barışlan hem Dooruluklan ilgili lozunglar baarardılar. Komrat hapsi bu kolonnalar kasabanın baş meydanına aktılar da burada konuylan ilgili bir miting oldu.

6-cı Türk Dünnäsi Ozannar Şöleni hem Ali Ekber Çiçek Anısına Aşık Literatürası Çalıştay

Sonu. Çeketmesi 5-ci sayfada

Eski türk devletlerin bayraklarinnan donaklı Şölenin ştenasında olan ana sırasının ilk payında açılış nasaa-tını Erzincan Binali Yıldırım Üniversi-tetin rektoru Prof. Dr. Akın LEVENT hem Prof. Dr. Ali KAFKASYALI yaptıktan sora, protokol sözleri için ştenaya Azerbaycan, Kazahstan, Özbekistan, Moldova (Gagauziya), İran hem Bulgariya devletlerindän gelän bilim insannarı buyur edildi. Hep bu zaman Prof. Dr. Jabbor ESHONQUL baaşladı Erzincan Binali Yıldırım Üniversitetin rektörüne Özbekistan milli halatını. Burada Ozan Nihat unudulmaz bir hava çaldı hem türkü söyledi.

Şölenin ana sırasının ikinci payında, ilktän Prof. Dr. Ali KAFKASYALI, sora da Prof. Dr. Hayrettin İVGİN başkannında “Ali Ekber Çiçek Anısına Aşık Literatürası Çalıştay” gerçekte. Burada pay alan bilim hem kultura insannarı bu konuda kendi fikirlerinnän tekliflerini açıkladılar. Ortaya “Türk Dünnäsi Ozannar Birlii” kurulması konusu da koyuldu, ama son karara görä şindilik “Dede Korkut Ozannar Birlii”ndä durgunuldu.

Ayrıca Akademik Todur ZANET baaşladı Şölenä kendisinin TİKA yardımınnan hazırlandı eni çıkan 6 tom-nuk “Büük Gagauzça-Rusça Sözlük” takımını, “Gagauzların kayıp olan dilinin hem kultura adetlerinin Moldovada korunması” adlı 3 tomnuk bilim kiyatlarını hem dâ araştırma, annatmaklar, dramaturgiya hem peet kiyatlarını da.

Avşamneyin, “6-cı Türk Dünnäsi Ozannar Şöleni hem Ali Ekber Çiçek Anısına Aşık Literatürası Çalıştay” büük bir konfertlän baaşlandı. Konfert Türkiyenin Gimnasının çalmasınnan baaşladı. Ardından usta ozan Ali Ekber ÇİÇEK yaşaması hem yaratmaları için ştenadan annattılar onun kızı Ebru ÇİÇEK hem Prof. Dr. Ali KAFKASYALI.

Konferttā Azerbaycanın en anılmış aşkın Aşık ALESKERin unukusunın unukası Hatay ALESKERLİ, Azerbaycanın “Dede Alesker Ocaa” halk dernäa adından, ödüllendi Prof. Dr. Ali KAFKASYALI bu Ocaa en büük ödüllennän – Aşık Aleskerin duuma günün 200-cü yılın anması-na basılan “Aşık Alesker – 200” yu-

biley altın medalisinnän, angısı verildi Canabisinä büük ustalı, Türk dünnäsında aşıklık zanaatını gelişmesinä yaptı katkıları, bilimnär hem literatürada uurunda kıymetli çalışmaları hem paalı zaametleri için.

Şölenin konfert programasında pay aldılar Türkiyedän Aşık Günay YILDIZ, Aşık Kul NURİ hem ozan Hüseyin BAYRAM, Aşık Fuat ÇERKEZOĞLU hem Aşık Yaşar SARIKAYA, Aşık Abidin ÇINAR, Ozan NİHAT. Bu aşıkların aralarında İranın Türkmənistanından gelän babşiler Babşı Ebrahim JORCANİ, Babşı Meysam SHAERİ hem Babşı Hemat AGH, Kazakistanın akınnarı Bekaus NURİMAN hem Maleyke ALDAMZHAROVA, Azerbaycan aşıkları Şöhret KERİMOV, Buşlan MEMMADOV hem İbad ALLAHVERDİYEV zengin muzikalarinnan sesleyicileri büüledilär.

Aarlı halk ozanı Binali KILIÇlan Aşık Mevlit MERDOĞLUnun karışılı atışmaları, konfertā ilgi çekän gösterilerdän birisi oldu.

Programanın sonunda Özbekistandan Babşı Rasulbek ABDURRAH-



MANOVun hem Doç. Dr. İzzat MATYAKUBOVun ştenaya çıkmasınnan hem Bahşı Abdullah KÖSEnin katılmasınnan sona yaklaştı. Bahşı Abdullah KÖSE, orkestralı düzennemäylän “Anayurt Marşı”nı çalmasınnan hem bu sırada zal içindä türk bayrakların sallanmasınnan konfert baaşlandı.

Şölenä katılannara deyni Erzincan kasabasında hem dolay küülerindä tatıtmak gezisi da yapıldı.

Not. Bu Şölenä Todur ZANET için iki önemni iş oldu: Ozan Nihat baaşladı ona türküsünü “Gagauziyanın gülü – Todur Zanet” hem Türkiyedän prozaik hem kaligrafiyacı Ethem GÖKTÜRK kaligrafiya yazısınnan Canabisinin adını yazdı.



Her pazar futbol, beki dä, her pazar gollan gol!

Başlayıp Kirez ayın (iyün) 1-ndä Orak ayın (iyül) 20-dän Komratta, Gagauziyanın baş stadionunda, geçecek “Media Football League CUP Comrat” (“MFL CUP 2025”) futbol turniri, angısının ofițial partnörü “Ana Sözü” gazetası da oldu.



Nicä bildirdi “Ana Sözü” gazetasının redaktıyasına “MFL CUP 2025” futbol turnirini kuran hem hazırlayan Komrat kasabasının Munițiıy Sport Şkolasının (MŞŞ) direktoru Gavril Borisoviç TULBA, “MFL CUP 2025” futbol turnirına katılmaa deni baş urdular Gagauziyadan hem Moldovadan 12 komanda: FK “Asker Komrat”, FK “Betacon Plus”, FK “CMF Kahul”, FK “Constructorul”, FK “Galactika”, FK “Kara Beygir”, FK “Kirsovo”, FK “Kongaz”, FK “Maiak”, FK “Oguzsport”, FK “Tomay” hem FK “Vişiniovca”.

Canabisi açıkladı, ani “Media Football League CUP Comrat” (“MFL CUP 2025”) futbol turnirın gruba basamaanın çetilesi da artık atıldı hem belli oldu kim-kiminnän kuvetlän hem ustalıklarınnan yarışacak (*bakın patredi*).

MFL CUP 2025					
GROUP A			GROUP B		
1. FC TOMAY	0	1. FC ASKER KOMRAT	0		
2. FC OGUSPORT	0	2. FC MAIAK CHIRSOVA	0		
3. FC VISNIOVCA	0	3. FC GALACTICA	0		
4. CMF CAHUL	0	4. FC CONSTRUCTORUL	0		
5. FC KIRSOVO	0	5. FC KARA BEYGIR	0		
6. FC BETA CON PLUS	0	6. FC KONGAZ	0		

Komratta hepsimizi büyük futbol bekler. Kirez ayın (iyün) 1-ndä buyurun “MFL CUP 2025” futbol turnirın açılışına. Gelin, futbol-dan yan hem taraftar olun hem dä kendi komandalarınızdan tutun.

Gagauziya da “ATATÜRKü anma, Gençlik hem sport Günü” yortusunu baktı

106 yıl geeri, 1919-cu yılın Hederlez ayın (may) 19-da Mustafa Kemal ATATÜRK, Samsun kasabasına çıkarak, türk miilli savaşıma ruhunu ateşledi. Bu büyük olaylan ilgili Türkiyedä Hederlez ayın (may) 19-da “ATATÜRKü anma, Gençlik hem sport Günü” yortusu olarak kuruldu.

Çadırın U-16 kızlar voleybol komandası Bursa kasabasında Festivalä katıldı

Türkiyenin Bursa kasabasında olan “ATATÜRKü anma Günü, Gençlik hem sport yortusu” sıralarına Gagauziyanın Çadır kasabasında genç sportçular da katıldı.

“ATATÜRKü anma Günü, Gençlik hem sport yortusu”nnan ilgili olarak, Türkiye Bursa kasabasında Halklararası sport Festivali yapıldı. Bu kasabanın Baş primariyası tarafından burayı Moldova Respublikasının Gagauziya Avtonom-Teritorial Bölgesinin Çadır kasabasında genç sportçular buyur edildi – U-16 kızlar voleybol komandası.

Gagauziyayı üüsek uurda temsil edän çadırlyıklar, Festivalä katılan başka devletlerdän kız komandalarinnan dostluk baaları kurdular.

16 yaşınadan bu sportçuykaların Bursaya gitmesindä Kişinev TİKA ofisi yardımcı oldu.



Komrat ATATÜRK türk bibliotekasında 19-cu şahmata turniri yapıldı

Hederlez ayın (may) 19-da Komrat ATATÜRK türk bibliotekasında yapıldı, artık adetä dönän, sıradaki şahmata turniri, angısı her yılın Türkiyedä “ATATÜRKü anma Günü, Gençlik hem sport yortusu” sırasına adanêr.



Bu şahmata turniri 19-cu kerä yapıldı. Bu yıl onda diil salt Gagauziyadan, ama Moldovanın Basarabka, Kaul hem Kişinev kasabalarından da genç sportçular pay aldılar.

Şahmata turnirına dört yaş boyunda uşaklar katıldılar hem erleri bölä payettilär:

I-ci boy (2010 yıl duuması)

Çocuklar:

- 1-ci – Vladislav İVARLAK;
- 2-ci – Vitaliy JİMJI;
- 3-cü – Vadim NOVAK.

Kızlar:

- 1-ci – Anna KENDİGİLÄN;
- 2-ci – Ekaterina KİRÄKOVA;

3-cü – Kseniya VELİKOGLO.
II-ci boy (2011-2013 yıllar duuması)

Çocuklar:

- 1-ci – Andrian MOKANU;
- 2-ci – Vladislav KENDİGİLÄN;
- 3-cü – Dimitriy KOMUR.

Kızlar:

- 1-ci – Ekaterina KİROGLU;
- 2-ci – Melaniya ZUEVA.

III-cü boy (2014-2016 yıllar duuması)

Çocuklar:

- 1-ci – Daniil BURLAKU;
- 2-ci – Maksim KISSA;

3-cü – Viktor STANÇEV.

Kızlar:

- 1-ci – Eva KİRÄKOVA;
- 2-ci – Polina HUDOBA;
- 3-cü – Anna SLAVOVA.

IV-cü boy (2017-2019 yıllar duuması)

Çocuklar:

- 1-ci – Nikita PEEV;
- 2-ci – Matvey İBRİŞİM;
- 3-cü – İliya BOLGAR.

Kızlar:

- 1-ci – Daşa VELİKOGLO;
- 2-ci – Kseniya SARI;
- 3-cü – Eva ARNAUT.



Avdarma muzeyinä “Büük ödül”

Hederlez ayın 16-da dünneyn Halklararası muzeylär günündä, Moldova kultura ministerliin tarafından hazırlandı hem Moldova Milli hem İstoriya muzeyindä düzennendi “Diişän toplumnarda muzeylerin gelecää” sırası.



Bu sıra çerçevesindä, Moldova kultura ministerlii verdi kendi ödüllerini hem Diplomalarını onara, kim kultura varlın korunmasında hem tanıtmasında üstolan zaametlerini gösterdi.

En üüsek kalitedä zaametleri, varlın tanıtması hem büünkü günä uyan durumnara görä korunması hem erindeki

cümnenin örnekli katılması üzerä, hem dâ muzeografiya uurunda başarıları için “Büük ödül” verildi Gagauziyanın Avdarma küüyün istoriya muzeyinä. Muzeyin adından onu kabletilär bu muzeyin kurucusun İgnat KAZMALI hem muzeyin direktoru Olga TRANDAFILOVA.

Kongaz lişeyindän üürencilär Halklararası MEB Robot yarışmasında

Hederlez ayın (may) 21-24 günnerindä Türkiyenin Kayseri kasabasında geçti “17-ci Halklararası MEB Robot yarışması”, angısında pay aldılar Gagauziyanın Kongaz küyündän Süleyman Demirel adına Türk-Moldova teoretik lişeyindän üürencilär dâ.



Bu yarışmada Kongaz Süleyman Demirel adına Türk-Moldova teoretik lişeyindän üürencileri kendilerini en üüsek uorda gösterdiler. Ayrıca onnar şükür ettilär Türkiye Respublikasının milli üüredicilik ministerliinä hem Türk İşbirlii hem Koordinatıya Agenstvosuna (TİKA) bu yarışmaya katılmak için yardımcı oldukları için.

Varvara Topal adına gimnaziyasında “Evelki oynunnar”

Hederlez ayın 8-dä Kongazın Varvara Topal adına gimnaziyasında oldu gagauz evelki oynunnarınan ilgili hazırlanmış olan “Evelki oynunnar” gösterisi, ani adandıydı burada kurulan “Kongaz korafları” şkola muzeyinin eni erä taşınması hem orada erleşmesi sırasınan.

“Evelki oynunnar” gösterisini, kendi üürediciykasının Pelagiya Andreevna KOVRİKOVANIN hem ona yardımcı olan Olga Georgiyevna KAPAKLININ zaametlerinnän, hazırladılar Varvara Topal adına gimnaziyanın 3-cü klaslarda üürencileri. Başlayıp bilmeceleerä hem bulmacalara cuvap vermektän, uşaklar gösterdiler dedelerimizin kalma oynunnarı: “Çıkar kalpaa”, “Beşka”, “Bız”, “Kız gelin alarız”, “Kukla uyutmak”, “Kuran” hem “Uzun eşek”.

“Beşka” oyununu gösterdi bir üürencinin anası – İvanna BORLAK. Taa bir ana, Polina UZUN, kendi oolunnan “Kuran” oynadı. Bundan kaarä, bu sıraya maasuz buyur edilän karı, Yana bulü TARALEŞ, gösterdi hem üüretti uşakları nicä iplän “Düzen” oyununu oynamaa.

Kongazın Varvara Topal adına gimnaziyasında “Kongaz korafları” şkola muzeyin yortusuna hem “Evelki oynunnar” gösterisinä, şannı musafir olarak, buyur edildiler Akademik Todur ZANET, küüyün primarı Mihail ESİR, Gagauziya Radio hem Televideniye (GRT) cümne Kompaniyasının jurnalisti Polina BARBOVA, gimnaziyanın büünkü direktoru Mariya Stepanovna ARNAUT, gimnaziyanın eski direktoru hem bu muzeyin kurulmasının fikir saabiykası Olga Petrovna ÇEBANOVA, gimnaziyanın muzıkada üüredicisi Mihail PAÇI hem Kongaz Nikolay Çebanov adına gimnaziyasının küçük klaslarda üürediciykası Matröna Dimitrievna KÖR.

Bu gözäl gösteridä nasaat edennär Akademik Todur ZANET hem küüyün



primarı Mihail ESİR kutladılar gimnaziyayı hem üüredicilärlän üürencileri bu gözäl hem kıvrak sıraylan hem da baaşladılar enidän açılan muzeyä kendi baaşışlarını, verip onnarı muzeyin başına Mariya Matveevna GROZDEVAYA.

Kaldı urgulamaa, ani “Kongaz

korafları” şkola muzeyindä büünkü gündä bulunêr 500-zä yakın ekspонат, ama, nicä açıkladı gimnaziyanın direktoru Mariya Stepanovna ARNAUT: “Şkolaya may hergün uşaklar eski işleri getirerlär da, umudumuz var, ani muzeyimizdä bu ekspонатların sayısını bir binädän zeedeletmää”.



“ANA SÖZÜ” Gagauz dilindä gazeta
Çıkêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basılêr
Tiraj – 3020 ekz. Sımarlamak No: 576

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 022 28-18-04
e-mail: todur.zanet@gmail.com
zanet@anasozu.com